



**Margheta (Gitti)
Bearth-Gamboni**

* 04-02-41

† 24-06-02

**Gitti cun beadia Samira Dimitri
e Vladimir da Tschernobyl/Weissrussland**

La notg bufatg sesbassa
en sogn ruaus.
Sche seiges en quell'ura
o Diu ludaus.

En Tei hai giu fidonza
miu Diu suprem.
Has dau a mi cardientscha
uss das ruaus etern.

Aschia bufatget ha gl'aunghel dalla mort suatiu Tei cara Gitti nunspetgadamein entrais ina disdida dil cor ella vegliadetgna da mo 61 onn. Cun tun lamentont e trest ha'l zenn grond da sogn Vigeli palesau la tresta niviala dalla mort dalla buna mama Gitti Bearth. Strusch da capir la sera plein veta e humor e la damaun gia tier Tiu scaffider, il retg sur veta e mort. Ina nundescrivibla frida pil consort, ses dus feglis e sia feglia. Tristezia e dolur ella famiglia e tuts parents. Mo era ils parochians dalla pleiv Tujetsch ein consteri e partan la dolur culla famiglia en cordoli. Vegli il Segner dar forza da purtar quella greva sort.

Gitti sco ella vegneva numnada ei stada feglia da Giachen Giusep Gamboni e Barla Catrina nata Valier. El ravugl da buns geniturs e sis fargliuns ha ella passentau ina ventireivla affonza a Sedrun. Suenter las scolas en vischnaunca hai giu num alla cara Gitti da prender il fagot e serender egl jester e gudignar e segidar culla famiglia. Quella sort havevan aunc biars auters Tujetschins. A Genevra ha ella luvrau ed empriu franzos, carteivel schess ella empriu Franz - Chäs. Lu a Lucerna e pliras sesiuns ell'Engiadina. Pli tard returnada ella Val nativa lavura ella sco cameriera en differentas ustrias en Tujetsch.

1964 marida Gitti cun Gion Bearth da Rabius. Ad els schenghegia Dieus treis affons. Tgei legria e sulegl en casa, mo era lavur e quita. In di da speciala legria ei stau cu ella ei vegnida tatta.

Caracterisar la Gitti ei buca aschi grev. Ina buna mumma cun in niebel e bien cor, era cartenta, luvrusa e pietusa. Da Nossadunna, sogn Giusep e songn Antoni era ella ina ferventa veneratura. Il di avon sia mort haveva ella aunc visitau la Mumma digl agid a Selva.

En cumpignia steva Gitti bugen. Cun Siu secuntener e temperament legher e content e siu saun humor eran premissas che mintgin steva bugen en sia vischinonza. In scart troccas era savens Siu divertiment. Siu temps preferiu era segir il tscheiver. Quel gudeva ella cun tgierp ed olma. Aschia eis ella era vegnida elegida sco bagat per in onn. Quei ha Gitti era gudiu ils onns suenter en mintga til da tscheiver e quei cun raschun. Tier sia lavur quotidiana senuspeva la defuncta buca da prestar survetschs.

En plirs camps da ministrants eis ella stada sco gidontra. Era eis ella stada inizianta dils viadis en cumpignia dalla Pleiv Tujetsch che vegnan organisai da nies plevon sur Alexi Manetsch. Dils biars ha Gitti priu part. Cul concarstgaun segidava ella bugen. Adina puspei han affons da Tschernobyl astgau passentar vacanzas en siu dacasa e segiramein ein quels vegni puppergnai cul bien cor dalla Gitti e siu mariu. Secape-scha ha la defuncta era giu temps pensivs ed umbrivauns. Mo era quei ha ella dumignau cun fidonza e ferma cardientscha.

Cara Gitti: Ti has ussa battiu las sendas da quest mund. Tes cars ein trests, nus essan consterni. Mintgatonlein nus visitar Tei sin santeri e mantener Tei en buna memoria. Gauda ussa per Tiu tut bien prestau gl'engraziament da nus tuts e retscheiva dil suprem la paisch e la legria celestiala.

Alla famiglia en malencurada forza curascha e cardientscha e lu in di sin seveser ellas sferas perpetnas.

Ruaussa en paisch.

Vinzens Pally